

## Košarkaši OKK Slobode sutra protiv Zrinjskog, s Mostarcima izgubili sve prethodne duele



Sutra su na programu susreti 6. kola Lige za prvaka košarkaša BiH. Tuzlanska OKK Sloboda, koja igra po sistemu toplo-hladno, dočekuje ekipu aktuelnog prvaka države, Zrinjskog.



Nakon loše igre i teškog poraza protiv Vogošće, uz malo opravdanje zbog neigranja Jovanovića i Thondiquea, koji istini za volju nema neku posebnu težinu, osim štete po image kluba, teško je očekivati pobjedu protiv ekipe koja je slavila u sva tri prethodna susreta s Tuzlacima.

Zrinjski je, naime, u prvenstvu pobijedio ekipu Josipa Pandže 89:65 u Mostaru, te 81:79 u Mejdanu, kao i u 1. kolu Lige za prvaka u Mostaru 84:82. Posljednji meč je bio "za jednu loptu", a naredni meč protiv Sparsa u Tuzli i velika pobjeda (105:104) najavili su veće mogućnosti "crveno-crnih", pogotovo nakon što su bodovi doneseni i iz Mrkonjić Grada.

A onda je uslijedio debakl protiv Vogošće i neke stvari, ipak, treba realno nazvati pravim imenom: OKK Sloboda ima solidnih 5-6 igrača, ali ne i ostatak klupe. I ako jedan ili dva jača igrača izostanu zbog povrede ili bolesti, dogodi se – Vogošća!

Pojedini dovedeni igrači, ne pružaju ni izbliza ono što se od njih očekivalo. Ekipe ne djeluje jako u voljnom smislu, nešto ne štima, a nismo "specijalizirani" da procjenjujemo šta je po srijedi.

Osim Zrinjskog, sve pobjede protiv OKK Slobode do sada ima i vodeći Široki (3-0), a bolji skor ima i Vogošća (2-1).

Zanimljivo je da tuzlanski sastav jedino protiv Mladosti i Sparsa ima bolji skor (po 2-1), s tim što valja podsjetiti i na onu kup utakmicu finala sistema A protiv Sparsa, kada je za devet posljednjih minuta prokockana prednost od 22 poena, što je u konačnici Pandžin sastav koštalo završnice Kupa BiH u Aleksandrovcu.

Sutrašnja utakmica protiv Zrinjskog počinje u 19.30 sati, uz očekivanja da se ekipa trgne iz letargije i pokaže drukčiju sliku od trenutne, bez obzira na konačan ishod. Barem kao najavu mnogo bolje OKK Slobode uoči play-offa.

Istina, ključni cilj za sezonu je ispunjen, a to je plasman među šest najboljih ekipa u BiH. Ali, dojam je mnogo slabiji ako se uzme u obzir da je ekipa dobila 15 utakmica, od kojih 10 protiv ljubova koji su se borili za opstanak, dok je u ukupnom skoru nanizano čak 10 poraza, svih 10 od klubova "velike šestorke". (mp, tl)

Date: 16-04-2019